



Tužilaštvo-Tužiteljstvo Bosne i Hercegovine
Тужилаштво Босне и Херцеговине

Broj: A – 445/05
Sarajevo, 06.10.2005. godine

U smislu odredbi člana 20. tačka 1. Zakona o slobodi pristupa informacijama u Bosni i Hercegovini (Službeni glasnik BiH broj 28/00), te člana 11. Zakona o Tužilaštvu Bosne i Hercegovine (Službeni glasnik BiH broj 42/02; 3/03; 37/03), Glavni tužilac Tužilaštva Bosne i Hercegovine, donosi dana 05.10.2005.godine

V O D I Č

O pristupu, objavljivanju i dostavljanju informacija u posjedu i pod kontrolom Tužilaštva Bosne i Hercegovine

Polazeći od odredbi Zakona o slobodi pristupa informacijama u cilju veće transparentnosti i odgovornosti javnih organa, ovaj vodič omogućava podnosiocima zahtjeva pristup informacijama pod kontrolom Tužilaštva Bosne i Hercegovine. Vodič uključuje bitne elemente postupka podnošenja zahtjeva za pristup informacijama, zajedno sa uzorkom zahtjeva u pisanoj formi, informacije o vrstama izuzetaka, pravnim lijekovima i bitnim rokovima, te troškovima umnožavanja. Vodič upućuje i na Index registar informacija, kao i na način pristupa tom registru. Vodič je besplatan i dostupan je strankama na zahtjev, a dostavlja se Ombudsmenu, te javnim i pravnim bibliotekama.

Opće informacije:

Sjedište Tužilaštva Bosne i Hercegovine je u Sarajevu, ulica Kraljice Jelene, broj 88. Informacije pod kontrolom Tužilaštva BiH sadržane su u Index registru koji je sastavni dio ovog vodiča.

Lice zaduženo za informisanje kod Tužilaštva BiH je:

Erna Filipović

Telefon ++387-33-707-100

Fax ++387-33-707-463

e-mail adresa: info@tuzilastvobih.gov.ba

Postupak za pristup informacijama

Zahtjev

Svako fizičko i pravno lice ima pravo podnijeti zahtjev za pristup informacijama iz nadležnosti, Tužilaštva BiH.

Zahtjev se podnosi u pismenoj formi na jednom od službenih jezika BiH, putem pošte ili neposrednom predajom u kancelariji za prijem pošte u sjedištu Tužilaštva BiH.

Zahtjev mora biti jasan i sadržavati dovoljno podataka u vezi sa prirodom i sadržajem informacije.

Ako zahtjev podnosi fizičko lice dužno je dokazati svoj identitet ličnim dokumentom.

Ako je zahtjev sačinjen od strane zakonskog zastupnika ili punomoćnika, navedena lica potpisuju zahtjev uz prezentiranje dokaza o zastupanju i svog identifikacijskog, ličnog dokumenta sa fotografijom.

U slučaju da pismeni zahtjev ne ispunjava gore navedene uslove o tome će podnosilac zahtjeva biti obaviješten, a eventualno preinačeni zahtjev smatrat će se kao novi.

Postupanje po zahtjevu

Po prijemu zahtjeva, ovlaštena lica iz Tužilaštva BiH će razmotriti činjenice i okolnosti od značaja za obradu zahtjeva.

Podnosilac zahtjeva se, najkasnije u roku od 15 dana od prijema zahtjeva, obavještava od strane Tužilaštva BiH da li je pristup informacijama odobren u cjelosti, djelimično ili je odbijen. Navedeni rok od 15 dana može biti produžen za sedam dana u slučajevima predviđenim Zakonom o slobodi pristupa informacijama.

Odobrenje pristupa informacijama

U slučaju odobrenja pristupa informaciji, podnosilac zahtjeva se obavještava o mogućnosti

- ličnog pristupa informaciji ili
- dostavljanju informacije ukoliko je ista kraća od deset stranica ili
- mogućnosti umnožavanja, uz naknadu, ako je informacija duža od deset strana.

Naknada po jednoj stranici standardne veličine je 0,50 KM.

Odbijanje zahtjeva pristupa informaciji u cjelosti ili djelimično

Tužilaštvo BiH može odbiti zahtjev za pristup informaciji u cjelosti ili djelimično za slijedeće vrste informacija:

- Kada se otkrivanjem informacije osnovano može očekivati izazivanje značajne štete po legitimne ciljeve za slijedeće vrste informacija:
 - interes odbrane i zaštita javne sigurnosti
 - sprečavanje kriminala i svako otkrivanje kriminala
 - zaštita procesa u donošenju odluka utvrđenih zakonom
- Kada zahtjev za pristup informacijama uključuje povjerljive komercijalne interese treće strane
- Kada zahtjev za pristup informacijama uključuje lične interese koji se odnose na privatnost trećeg lica u skladu sa Zakonom i Evropskom konvencijom o zaštiti ljudskih prava i temeljnih sloboda, (član 8)
- Kada se radi o maloljetnim počinocima krivičnih djela i kada su maloljetnici oštećeni krivičnim djelom
- Kada se radi o poštivanju pretpostavke (presumptio) nevinosti
- Kada se nakon provedenog postupka, utvrdi da objavljivanje informacije nije od javnog interesa.

U slučaju odbijanja pristupa informaciji djelimično ili u cjelosti, podnosilac zahtjeva će, u smislu člana 14. tačka 3. Zakona o pristupu informacijama, biti obaviješten u roku od 8 dana sa uputom o mogućnosti podnošenja žalbe Glavnom tužiocu Tužilaštva Bosne i Hercegovine i prava obraćanja Ombudsmenu.

*GLAVNI TUŽILAC
TUŽILAŠTVA
BOSNE I HERCEGOVINE*

MARINKO JURČEVIĆ